

Xujun xi tjun kits'ínntu nda postru Jua

B'í ts'ín tsakúya Jua yáha Éen

¹ Tíb'enijmíihí xi tu b'a ts'ín jahá tíjña santa nkúhu nga tuts'ihín ní. Kinu'yái ntaha ko tukuin kiyakohóni. Kiyai ko ntsai kin'ekohóni. Kui xi Én xi ts'ínk'íéntu tík'un xuta. ² Y'ejña tík'un ajinní ko jin kiyai. Tíbixínya kixi ní xi kiyai ko tíb'enijmí xi tíjña tík'un sín, xi y'ejñajihín Ntia Na'miu ko xi jin kis'ejña chjini.

³ Xi kiyai ko kinu'yái, kui xi ta tíb'enijmíihí ko jun, tu xi b'a ts'ín ko jun nkuhú kamakohóni. B'a ts'ín nkuhú kamangujinkaá Ntia Na'miu ko Jesucristo xi Ntíhi maha. ⁴ Tíb'et'aihi ni xu'bi tu xi k'úé tsjo tsjohonuu.

B'í ts'ín tsakúya Jua nga ni xi n'eé bakúchji tsa kis'ejinná Ntíaná

⁵ Tsakúyani Jesucristo nga Ntíaná, kui xi nd'í xi ts'ín ndzjen ko ndahachí najmi tjín má jyun ajihín. Kui xi tíb'enijmíihí. ⁶ Tsa b'a kuixíaán nga Ntíaná ts'ená ko tu sa má jyuuhún tintsuba ngáá, tích'anachaá ko najmi tín'eé ni xi naxu tjín. ⁷ Tunga tsa tintsubaá má ndzjeen xi nkú ts'ín tíjña Ntíaná má ndzjeen, b'a ts'ín nkuhú makaá xinkia ko jníhi Jesucristo xi Ntíhi Ntíaná ts'ín jená nga kjexinná ngayjeé ngatitsunná.

⁸ Tsa najmi tjinná ngatitsun kuixíaán, ta ñaha tích'anachahaá yjoná ko najmi tíjñajinná ni xi naxu

tjín. ⁹ Tsa n'ekié yjoná nga tjínná ngatitsun, ts'íinndyat'aná ngatitsunná Ntíaná kō ts'ín jená nga kjéxinná ngayjee ni xi tjíntujínná xi najmi naxu nginkun. B'a ts'ín at'ahá ja kitsjá éhen nga b'a ts'ín kō ts'ín ni xi naxu tjín. ¹⁰ Tsa najmi tjínná ngatitsun kuixíaán, tíya tsank'áá Ntíaná kō najmi tíñajin animaná éhen.

2

¹ Jun ntína, túb'et'ánuu ni xu'bi tu xi najmi n'ehenu ngatitsun. Tunga tsa tjín xi ts'ín tjen'yún ngatitsun, tíñaná xi kuinchjantjainá nginkun Ntia Na'miu, kui xi Jesucristo xi naxu ts'ín. ² Kui xi kitsjá yjoho xi nkúhu chje tu xi n'endyat'ahaná ngatitsunná ñá xi ja kis'ejinná. Kō najmi tu suba ngatitsunná kits'ínndyat'a, kō ní ngatitsuhun ngayjee xuta xi tjín asuntee.

³ Tsa tén'etjusaán ni xi y'éjña Ntíaná, b'a ts'ín yahaná nga ja yaá Ntíaná. ⁴ Tsa tjín xi: “An be” kuitsu, tunga tu sa najmi ts'intjusuhún ngá ni xi y'éjña, kui xi nda tsank'á. Najmi tíñajin animaha ni xi naxu tjín. ⁵ Tunga xi ts'intjusun éhen, kjuaxi nga kui xi ts'intjo Ntíaná xi nkú nga ts'ín tjihin nga ts'intjo. Nk'ie nga b'a n'e bintsubaá, b'a n'e yahaná nga tintsubajihin. ⁶ Xi tíñajin ni xi ts'e Ntíaná kuitsu, kui xi xi nkú ts'ín y'éjña Jesucristo, b'a ts'ín tjihin nga k'úejña.

B'i ts'ín tibatéxumaha Jua xuta ninku

⁷ Já nts'ena, ni xi túb'et'ánuu nd'ai, najmi as'ai túb'éjñahá Ntíaná. Kjuatéxuma chá xi kin'ekjas'en nínuu santaha nga tuts'ihin ni tibet'ánuu. Kui kjuatéxuma chá xu'bi, kui éhen xi ja kinu'yó nk'ie.

⁸ Tunga xi nkú ts'ín y'ejña Jesucristo ko xi nkú ts'ín tintsu_{bo} b'ejña chji nku ni tsetse xi y'aha ra ni xi y'ejña Ntiana. Kui ni xi tít'et'ánuu ei at'aha ja j'ai ts'ín ndzjen nd'í xi ndoo. Kui nga ja tífi ndyjaha má jyuun.

⁹ Xi b'a kuitsu nga má ndzjeen síjña tunga tu sa unkiehé ngá nda nts'e, kui xi má jyuun síjñajin sa. ¹⁰ Xi tjoho nda nts'e, kui xi má ndzjeen síjña tehente, má nga najmi tjín ni xi ts'ínkijnejihin ngatitsun. ¹¹ Tunga xi unkie nda nts'e, kui xi má jyuun síjña ko yo tsú'ba ko najmi be má xi tjeheh tífi, at'aha ja kits'ínkaha má jyuun.

¹² Jun ntína, títs'inntúnuu at'aha tu ngat'aha ni xi kits'ín Jesucristo kin'endyjat'ahanuu ngatit-sunuu. ¹³ Ko jun xi tí'minuu na'mi, títs'inntúnuu at'aha ja yo xi tu b'a ts'ín jahá tíjña santaha nga tuts'ihin ni. Ko jun xi tí'minuu já asti, títs'inntúnuu at'aha kin'e nganohoo ndanindoo.

¹⁴ Jun ntína, ja kuats'inntúnuu at'aha ja yo Ntia Na'miu. Ko jun xi tí'minuu na'mi, ja kuats'inntúnuu at'aha ja yo xi tu b'a ts'ín jahá tíjña santaha nga tuts'ihin ni. Ko jun xi tí'minuu já asti, ja kuats'inntúnuu at'aha tjínnuu nga'yún ko tíjñajin tehente animanuu éhen Ntiana ko at'aha ja kin'e nganohoo ndanindoo.

¹⁵ Najmi tu n'etjó asuntee ko ta ndaha ni xi tsjá asuntee. Tsa tjín xi tjoho asuntee, kui xi najmi tjoho Ntia Na'miu. ¹⁶ At'aha ngayjee ni xi tsjá asuntee najmi má tíjña Ntia Na'miu nibáha ra. Asuntee ní nibáha ra. Yo nibáha ra nga nchjaha animaha xuta ni xi tjín ko nga mjehe ts'íints'e ni xi fásihin ko nga nk'a b'asje yjoho ngat'aha ni xi

tj́ihín. ¹⁷ Ja tife nistjihín asunntee kò ni xi nchjaha animaha xuta, tunga máha xi títs'ín xi nkú ts'ín mjehe Ntjáná, kui xi k'úéjña sín.

B'i ts'ín tsakúya Jua nga chúhuún yjoná já xi fi kontraha Jesucristo

¹⁸ Jun ntína, ja nistjin xi fekuu tintsubaá nd'ai. Ja kik'inyanuu nga tj́ihín nga kj'uaí xi ngjuai kontraha xi kits'ín nibá Ntjáná, kò xi nkú kik'inuu b'a ts'ín nd'ai ja t́incha f'ai nkjún já kontraha Jesucristo. Kui nga mankjihinná nga ja tinchaján nistjin xi fekuu. ¹⁹ Kui xi incha tsitjujinni ei, tunga najmi já ts'ajihín niu. At'aha tsa já ts'ajin niu, najmi incha ngji t'axín ra kai. Tunga incha tsitjuhú tu xi b'a ts'ín kiya chji chjihu nga tj́ín xi najmi jin makoni.

²⁰ Máha jun, Jesucristo kitsjánuu Espirituhu Ntjáná kò ngatentoo mankjinnuu ni xi naxu tj́ín. ²¹ Tíb'et'á xujunnuu at'aha mankjinnuu ni xi naxu tj́ín. Najmi ngat'aha tsa najmi mankjinnuu, at'aha ní nga mankjinnuu, kui nga t́b'et'áhanuu. Kò mankjinnuu nga ndaha nku kjuatsank'á najmi nibáha ra ni xi naxu tj́ín.

²² Xi najmi ts'ínkjáihín nga Jesu xi kits'ín nibá Ntjáná, kui xi nku nda tsank'á. Kui xi nda kontraha Jesucristo, at'aha najmi ts'ínkjáihín nga Ntjá Na'miná xi Ntjá kò nga Jesucristo xi Ntíhi. ²³ Tu yáhá ni xi najmi ts'ínkjáihín nga Jesucristo xi Ntíhi Ntjáná, kui xi ta ndaha najmi t́jñajihín Ntjá Na'miu. Tunga xi ts'ínkjáihín nga Jesucristo xi Ntíhi Ntjáná, kui xi ta t́jñajihín Ntjá Na'miu.

²⁴ Kui b'a maha, t'ejñajin tehentehenu animanuu én xi kinu'yó santa nkúhu nga tuts'ihín

ni. Tsa s'ejñajin tehente animanuu én xi kinu'yó santa nkúhu nga tuts'ihin ni, b'a ts'ín ko jun ta kuintsujin tehentoho Ntíu ko Ntíá Na'miú. ²⁵ Nga kuintsuba tik'un síaán, kui nihi xi kitsúya tíjunná Jesucristo nga tsjáná.

²⁶ Tíb'et'ánuu ni xu'bi at'aha tjin xi mjehe k'uanachanu. ²⁷ Tunga máha jun, tíjñajin tehentenu Espirituhu Ntíaná xi kitsjánuu Jesucristo. Najmi machéhen tsa tjin xi kuakúyanuu, at'aha ta kuihi Espiritu bakúyayenu. Ni xi naxu tjin bakúyanuu, najmi ni tsank'á. Kui nga xi nkú ts'ín tsakúyahanuu Espiritu, b'a n'e tintsujin tehentehe ruu Jesucristo.

²⁸ Kui b'a maha nd'ai, ntína, tintsujin tehentehe ruu Jesucristo, tu xi najmi jo jan kamahaná nk'ie nga kuakúchji yoho ko najmi kama subaná nginkun nk'ie nga kj'uaí. ²⁹ Yo nga naxu ts'ín Jesucristo. Kui nga ta tihin nga chahanu nga ngayjee xuta xi ts'ín ni xi naxu, kui xi kitsjáha Ntíaná nga ntíhi kama.

3

B'i ts'ín tsakúya Jua nga ntíhi Ntíaná kits'ín maná

¹ Chaso xi nkú ts'ín tjo ts'atíhi ñá Ntíá Na'miná, nga santaha ntíhi Ntíaná 'miná. Ko kjuaxi nga ntíhi Ntíaná ñá. Kui kjuaha nga najmi behená xuta asuntee, at'aha najmi be Ntíaná. ² Jun já nts'ena, ñá xi ntíhi Ntíaná nd'ai. Ko ndaha tsa najmi kjee yaá nkú k'úéntaá askahan, tunga yanáa nga b'a k'úéntaá xi nkúhu Jesucristo nk'ie nga kj'uaíkúchji yoho, at'aha chá sisián xi nkú tjin. ³ Ko ngatentee

xi b'a ts'ín tíkuyáha Jesucristo, kui xi títs'ín nga tín'e je nginkun Ntíaná. B'a tí'be xi nkú ts'ín je Jesucristo.

⁴ Tu yáha ni xi títs'ín ngatitsun, kui xi tibangane kjuatéxumaha Ntíaná. Nk'ie nga biyuné kjuatéxumaha Ntíaná, kui nij xi ngatitsuun. ⁵ Ja yo nga j'aikúchji yjoho Jesucristo tu xi j'aikjexihin ngatitsunná. Ndaha nku ngatitsun najmi kis'ehe. ⁶ Kui b'a maha, ngayjee xi tíñajin tehentehe ra Jesucristo najmi ts'ín ngatitsun. Tunga ngayjee xi títs'ín ngatitsun, najmi kjee be Jesucristo ko ta ndaha najmi kjee mankjihin yáha kui.

⁷ Jun ntína, najmi tu ch'a xi k'uanachanu. Xi ts'ín ni xi naxu tjin, kui xi naxu nginkun Ntíaná xi nkú ts'ín naxu Jesucristo. ⁸ Tunga xi ts'ín ngatitsun, kui xi ndanindoo ts'ehe, at'aha ndanindoo kits'ín ngatitsun santaha nkúhu nga tuts'ihin ni. Kui kjuaha nga j'aikúchjiji yjoho Ntíhi Ntíaná, tu xi ts'íindyja xáha ndanindoo.

⁹ Ngayjee xi Ntíaná kitsjáha nga kama ntíhi najmi nkaha ts'ín ngatitsun, at'aha kjuatik'uhun Ntíaná tíñajihin. Najmi nkaha ts'ín ngatitsun, at'aha Ntíaná kitsjáha nga kama ntíhi. ¹⁰ B'a ts'ín s'eña chjiji yá xi ntíhi Ntíaná ko yá xi ntíhi ndanindoo. Tu yáhá ni xi najmi naxu ts'ín ko a ra najmi tjoho nts'e, kui xi najmi Ntíaná ts'ehe.

B'i ts'ín tsakúya Jua nga n'etjáá xinkjá

¹¹ Nga tihin nga b'i ngjään n'etjáá xinkjá, b'a tsu én xi kinu'yó santaha nkúhu nga tuts'ihin ni. ¹² Najmi b'aha tu n'eé xi nkúhu Cain. Kui xi ndanindoo ts'ehe. Kui nga kits'ínk'iehen nda nts'e.

¿Á kits'ínk'iehen? Kits'ínk'ien at'aha naxu ni xi kits'ín nda nts'e ko máha kui, ch'on kits'ín.

¹³ Jun já nts'ena, najmi tu ma nkjúnnuu tsa ts'ín unkienuu xuta asunntee. ¹⁴ Ja yaá ñá nga tsitjujián ajihin ngabayoo ko nga kuintsuba tík'aán nginkun Ntíaná. Yaá ni xu'bi at'aha tjoná já nts'eé. Xi najmi tjihin kjuatjo, kui xi tijnajin sa ngabayoo. ¹⁵ Ngayjee xi unkie nda nts'e, ndats'ínk'ien animahá xu'bo, ko ja yo nga nku ndats'ínk'ien animá najmi tijnajihin kjuatik'un sín.

¹⁶ Yaá ni xi 'mihj kjuatjo at'aha Jesucristo kits'ínkjas'en yjoho ngandaná. B'a ta ts'ín ko ñá tjihin nga n'ekjas'eén yjoná ngandaha já nts'eé. ¹⁷ Tsa nku ndanchiná tibe nga ndyjat'aha nda nts'e ni xi machjéhen tunga najmi kama nimahá ra, ¿a tijnajin kjuatjoho Ntíaná animaha? ¹⁸ Jun ntína, najmi tu suba énnuu xi b'a kuitsu nga tjinnuu kjuatjo nga chubo. Tu sa ní ni xi katakúchji nga tjinnuu kjuatjo n'oo.

¹⁹ Yaá nga ajihin ni xi naxu tintsubajían ko najmi jo jan maná nk'ie nga tintsubaá nginkun Ntíaná. ²⁰ Kui nga ndaha tsa animaná b'a títsu nga tjinná jé, tunga 'yuhún chánka sa Ntíaná nga animaná ko kui xi beyjená. ²¹ Jun já nts'ena, tsa najmi chumi nihi xi títs'ínnijéná animaná, najmi jo jan maná nga tinchaá nginkun Ntíaná, ²² ko kui tsjáná ngayjee ni xi kuinchihí, at'aha tín'etjusaán ni xi y'éjña ko tín'eé ni xi sasihin.

²³ Nga n'e s'ejían Jesucristo xi Ntíh maha ko nga b'i ngján n'etjáá xinkjá xi nkú ts'ín y'éjña, kui xi kjuatéxumaha Ntíaná. ²⁴ Xi títs'íntjusun xi nkú ts'ín y'éjña, kui xi tijnajin tehente Ntíaná ko

Nt̄ianá t̄íñajin tehentehe xuta xu'bo. Kō ngat'aha Espiritu xi kitsjáná, b'a tā n'e yahaná nga kui t̄íñajin tehenená.

4

B'i ts'ín tsakúya Jua má xi kui Espirituhu Nt̄ianá

¹ Jun já nts'ena, najmi tu n'e s'ejiun ngatentee xi b'a kuitsunu nga Espirituhu Nt̄ianá tits'ín nga t̄inchja. Tu sa ní ch̄ase sisihuun xi nkú kuitsu, tu xi b'a n'e ch̄ahanu tsa k̄uaxi nga Espirituhu Nt̄ianá t̄íñajihin a ra najmi. At'aha kitsejihin asuntee já profeta tsank'á. ² Xi b'a tsu nga yjoninte kik'a Jesucristo nga j'ai asuntei, kui niu xi kuakúchjinuu nga kui xi t̄íñajihin Espiritu xi ts'e Nt̄ianá. ³ Kō xi najmi b'a tsu nga b'a ts'ín j'ai Jesucristo, kui xi najmi t̄íñajihin Espirituhu Nt̄ianá. Espiritu ch'onk'un xi ts'e ní nda kontraha Cristo t̄íñajihin. Ja kinu'yó nga t̄ihin nga k̄'uaí xi nḡuaí kontraha xi kits'ín nibá Nt̄ianá. Kui ja t̄íña asuntee nd'ai.

⁴ Jun nt̄int̄int̄ina, Nt̄ianá ts'enuu kō ja kin'e nganohoo já profeta tsank'á xu'bo, at'aha xi t̄íñajinnuu 'yún t̄ín saha nga'yún nga xi t̄íñajihin xuta asuntee. ⁵ Kui já xu'bo xi xuta asuntee. Kui nga ni xi ts'e asuntee nchjanijmíyaha kō xuta asuntee basínñjuyu ni xi nchja. ⁶ Tunga máha jin, Nt̄ianá ts'eni. Xuta xi ja be Nt̄ianá, kui xi basínñjuni. Xuta xi najmi Nt̄ianá ts'ehe, kui xi najmi basínñjuni. B'a n'e ch̄aha yá xi t̄íñajihin Espiritu xi tsuya ni xi naxu t̄ín kō yá xi t̄íñajihin jáninda xi b'anacha.

B'i ts'ín tsakúya Jua mí nihi xi y'aha k̄uatjoo

⁷ Jun já nts'ena, b'i ngján n'etjáá xinkjá, at'aha Ntíaná nibáha ra kjuatjoo ko ngayjee xi tjihin kjuatjo, kui xi kitsjáha Ntíaná nga ntíhi kama ko kui xi be Ntíaná. ⁸ Xi najmi tjihin kjuatjo, najmi kjee be Ntíaná, at'aha kjuatjohó Ntíaná.

⁹ B'i ts'in tsakúchjiná kjuatjoho Ntíaná. Kits'in nibá Ntí nku tutuhú asuntei, tu xi ngat'aha Ntíhi sakúhuná nga kuintsuba tík'aán. ¹⁰ ¿Mí nihi xi 'mihí kjuatjoo? Najmi tsa ñá xi kin'etjáá Ntíaná. Kui ní xi kits'intjoná ko kits'in nibá Ntíhi tu xi ts'ínndyjat'aha ngatitsunná nk'ie nga kitsjá yjoho xi nkúhu chje. Kuihí ni xu'bi xi tsakúchji kjuatjoo.

¹¹ Jun já nts'ena, tsa b'a ts'in kits'intjoná Ntíaná, kui nga ko ta ñá ta tjihin nga b'i ngján n'etjohoná xinkjá. ¹² Ndaha nku najmi kjee be nkú tjin Ntíaná, tunga tsa b'i ngján n'etjáá xinkjá, Ntíaná tíñajin tehentená ko kjuatjoho s'ejña chji kikjin ajinná.

¹³ Yaá nga tintsubajin tehenteheé Ntíaná ko nga kui tíñajin tehentená, at'aha kitsjáná Espirituhu. ¹⁴ Ko jin kiya kikjin ko tibixinyakixi nga Ntia Na'miú kits'in nibá Ntíhi tu xi ts'ínk'ankihi xuta xi tjin asuntee. ¹⁵ Tu yáhá ní xi ts'ínkjáihin nga Jesu xi Ntíhi Ntíaná, kui xi tíñajin tehente Ntíaná ko Ntíaná tíñajin tehentehe xuta xu'bo.

¹⁶ Mankjinná ko s'ejinná nga tjoho ñá Ntíaná. Ntíaná kui xi kjuatjo, ko xi tíñajin tehente kjuatjoo, kui xi tíñajin tehente Ntíaná ko Ntíaná tíñajin tehentehe xuta xu'bo. ¹⁷ B'a ts'in s'ejña chji kikjihin kjuatjoo ajinná, tu xi najmi jo jan kamahaná nistjin nk'ie nga kuasehe Ntíaná mí nihi xi kits'in nga nkúnkú xuta. At'aha xi nkú ts'in y'ejña Jesucristo, b'a ts'in tintsubaá asuntei.

18 Má nga tjin̄ kjuatjo najmi tjin̄ kjuabinkjun. Kjuatjo xi kui kikiun̄, kui xi m'osje kjuabinkjuun̄, at'aha xi tjen̄ kjuaha, kui xi tsankjun̄. Kui b'a maha, xi tsankjuhun̄, kui xi najmi kjeē tijñajihin̄ kjuatjo xi kui kikjin̄.

19 Ñá tjoná Ntíaná at'aha Ntíaná tjun kits'íntjoná.

20 Tsa tjin̄ xi: “Tjona Ntíaná”, kuitsū ko tu sa unkiehé ngá nda nts'e, kui xi tib'anacha. At'aha xi najmi tjohō nda nts'e xi tíma tibase'a, ¿nkú ts'ín ts'íintjoho Ntíaná nga najmi tíbe? 21 Xi tjohō Ntíaná tjihin̄ nga ta ts'íintjo nda nts'e. Kuihí kjuatexuma xu'bi xi kin'ekjáiin̄.

5

B'i ts'ín tsakúya Jua ni xi ts'ín xi ntíhi Ntíaná

1 Ngayjee xi s'ejihin̄ nga Jesu xi kits'ín nibá Ntíaná, kui xi kitsjáha Ntíaná nga ntíhi kama. Ko ngayjee xi tjohō Ntia Na'miná, kui xi ta tjohō ngayjee xi ntíhi Ntíaná. 2 Nk'ie nga tjoná Ntíaná ko tín'etjusaán ni xi y'éjña, ya chji chjiá nga ta tjoná ngayjee xi ntíhi Ntíaná. 3 Nga n'etjáá Ntíaná, kui xi tsuhū ra nga n'etjusaán ni xi y'éjña. Ko najmi ch'á xi ái ni xi y'éjña Ntíaná, 4 at'aha ngayjee xi ja ntíhi Ntíaná ts'ín nganahā asunteē. Ko ngat'aha nga s'ejinná Jesucristo, b'a ts'ín kin'e nganahā raá asunteē. 5 Xi s'ejihin̄ nga Jesu xi Ntíhi Ntíaná, kui xi ts'ín nganahā asunteē.

B'i ts'ín tsakúya Jua xi nkú ts'ín Ntíaná y'éjña chji Jesu

6 Ntánijua ko jní j'ai s'ejña chjili Jesucristo. Najmi tū suba ntánijua, ntánijua ní ko jní. Ko Espirituhū Ntíaná ta tsuya kui nii, at'aha kjuaxi ni

xi nchja Espiritu. ⁷ Jan maha xi b'éjña chji yáha Jesucristo: ⁸ Espirituhu Ntíaná, ntánijuo ko jnú. Nkuhú b'a incha tsu nga joon.

⁹ Tsa n'ekjáihín én xi nchja xuta nga nchjanijmíyaha nku ni, tunga yúhún chjíhi ra én xi nchja Ntíaná. Á 'yún chjíhi ra, at'aha Ntíaná xi kinchja nga y'éjña chji Ntíhi. ¹⁰ Xi s'ejihín Ntíhi Ntíaná, kui xi animaha tíñajihín én xi kinchja Ntíaná nga y'éjña chji Ntíhi. Tunga xi najmi s'ejihín Ntíaná, kui xi tibe tsank'á, at'aha najmi s'ejihín én xi kinchja Ntíaná nga y'éjña chji Ntíhi.

¹¹ Nga kitsjáná nga kuintsuba tík'un síán ko nga Ntíhi sakújinná kjuatík'un xu'bi, kui én xu'bi xi kinchja Ntíaná. ¹² Xi tíñajihín Ntíhi Ntíaná, kui xi tíñaha kjuatík'uun. Tunga xi najmi tíñajihín Ntíhi Ntíaná, kui xi najmi tíñaha kjuatík'uun.

B'i ts'ín kits'ínkje Jua xujuin

¹³ Kuak'iet'ánuu ni xu'bi, jun xi s'ejinnuu Ntíhi Ntíaná, tu xi chahanu nga tíñanuu kjuatík'un xu'bi ko kuintsuba tík'un síún.

¹⁴ Ma'yúnk'aán Ntíaná, at'aha yaá tsa kuinchihíi xi nkú ts'ín mjehe nga kuinchihíi, kuasínñjuná.

¹⁵ Ko xi nkú ts'ín yaá nga Ntíaná basínñjuhu tu mí nihí ni xi binchihíi, b'a ta ts'ín yaá nga ja n'ekjáihín ni xi kuakinchihíi.

¹⁶ Tsa tjín xi tibe nga ngatitsun títs'ín nda nts'e, ko tsa ngatitsun xi títs'ín najmi ngabaya tjehe ra, nk'ie nga kuinchjako Ntíaná kanchjantjai ko Ntíaná tsjá ngáha ra nda nts'e nga k'úejña tík'un. Ngatitsun xi najmi tjehe ra ngabaya tinchjanijmíyahana. At'aha tjín ngatitsun xi tjehe ra ngabaya. Najmi tbankia nga chubantjo xi ts'ín

ngatitsun xu'bo. ¹⁷ Ngayjee ni xi najmi nda xi ts'in xuta, kui xi ngatitsun, tunga tjihin ngatitsun xi najmi tjeheh ra ngabaya.

¹⁸ Yaá nga xi kitsjáha Ntíaná nga kama ntíhi najmi nkaha nga ts'in ngatitsun, at'aha Ntíhi Ntíaná kuhun xuta xu'bo ko najmi ts'inkoho ndanindoo.

¹⁹ Ko yaá nga Ntíaná ts'ená ko nga ndanindoo batéxumaha ngayjee asuntee. ²⁰ Ko ta yaá nga j'ai Ntíhi Ntíaná ko kitsjáná kjuankjintak'un tu xi chahaná Ntia xi nku tutuu. Tintsubajihín xi nku tutuu, kui xi Jesucristo Ntíhi Ntíaná. Kuihi xi Ntia xi nku tutuu ko kui xi tsjáha nga k'úentu tik'un sín xuta.

²¹ Jun ntína, tiyú t'axíhun ntia xi xuta ts'ínnda.

Éhen Ntíaná
New Testament in Mazatec, Jalapa de Díaz
(MX:maj:Mazatec, Jalapa de Díaz)

copyright © 2013 Wycliffe Bible Translators, Inc.

Language: Mazatec, Jalapa de Díaz

Translation by: Wycliffe Bible Translators, Inc.

Mazateco, Jalapa de Díaz [maj], Mexico

Copyright Information

© 2013, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mazatec, Jalapa de Díaz

© 2013, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

e05183c2-7c34-5cdd-8c78-15ea51bd8cbb